



Komunikadu Imprensa
15 Dezembru 2022
Parlamentu Nasionál

**Preokupa ho konstitusionalidade Lei Organizasaun Judisiária:
JSMP rekomenda ba Prezidente Repúblika atu husu fiskalizaun preventiva no
abstrata ba lei refere**

Parlamentu Nasionál iha loron 12 Dezembru 2022, liuhusi reuniaun plenária aprova ona aprova iha finál globál ho votu afavór 39, kontra 0 no absteinsaun 0 ba Projetu Lei Nú.47/V(4^a) Primeira alterasaun ba Lei Nú.25/2021 Lei ba Organizasaun Judisiária.

Objetivu prinsipál husi alterasaun ne'e mak atu fiksa prazu foun ba instalasaun Tribunál Supremu Justisa (STJ) no Tribunál Rekursu (TR) inklui fiksa mandatu foun ba Komisaun Instaladora.

“JSMP hanoin katak maski alterasaun ne'e importante hodi fó espasu tempu ne'ebé natoon ba Komisaun hodi bele hala'o nia serbisu ho kualidade, maibé JSMP preokupa ho intervensaun polítika iha setór judisiáriu hanesan hari'i sede Komisaun ba Selesaun no Rekrutamentu juis iha Parlamentu Nasionál ho nia orsamentu tama iha orsamentu privativu Parlamentu Nasionál nian. Nune'e, JSMP rekomenda ba Prezidente Repúblika hodi husu fiskalizaun preventiva no abstrata ba lei refere,” dehan Diretora Ezekutiva JSMP, Sra. Ana Paula Marçal.

Tuir JSMP nia haree, provizaun alinea b) parágrafo 2) Artigu 125 K-RDTL prevee katak juis sira STJ nian, alende ida Parlamentu Nasionál mak nomea, sira seluk Konsellu Superiór Majistratura Judisiál (KSMJ) mak nomea. Provizaun parágrafo 1) Artigu 128 prevee mós kona-ba kompeténsia KSMJ hodi nomea juis sira STJ nian. Ida ne'e signifika, kuaze juis sira STJ sei nomea husi KSMJ.

Nune'e, JSMP hanoin, sede Komisaun ba selesaun no rekrutamentu juis nian tuir loloos harii iha KSMJ nia okos ka supervizaun, nune'e, bele tulun no fasilita prosesu selesaun no rekrutamentu ne'ebé di'ak no evita konfliktu interese no intervensaun polítika. Tanba ne'e, JSMP rekomenda atu bele altera mós provizaun parágrafo 10) Artigu 83 Lei Nú. 25/2021 kona-ba Lei Organizasaun Judisiária ne'ebé prevee katak Komisaun ba selesaun no rekrutamentu juis sira ne'e nia sede iha Parlamentu Nasionál atu instala iha tribunál.

JSMP rekomenda ba Prezidente Repúblika uza poder konstitusionál tuir provizaun aliñea e) Artigu 85, parágrafo 1) Artigu 149 no alinea a) Artigu 150 K-RDTL hodi husu ba STJ nia apresiasaun preventiva no abstrata ba iha provizaun parágrafo 1) Artigu 83 kona-ba extensaun prazu no parágrafo 7) no 8) kona-ba prazu nomeasaun ba Komisaun Rekrutamentu no Selesaun.

Iha parte seluk, JSMP mós hanoin katak importante atu valoriza investimentu Estadu nian no investimentu pesoál juis kareira sira no sira-nia serbisu, dedikasaun no kontribuisaun ne'ebé hala'o durante ne'e nu'udar juis TR no mós iha tempu hanesan hala'o knaar hanesan Juis Konselleru STJ nian. Juis sira ne'e, JSMP rekomenda atu la nesesariamente partisipa iha prosesu selesaun no rekrutamentu, maibé simu de'it nomeasaun husi KSMJ ba juis Konselleru STJ nian. Atu bele aseguara legalidade iha prosesu ne'e, JSMP rekomenda ba Prezidente Repúblika no Parlamentu Nasionál hodi prevee kedas artigu ida kona-ba prosesu ida ne'e.

Atu hetan informasaun kompleitu, favór kontaktu:

Ana Paula Marçal
Diretora Ezekutiva JSMP
Diresaun e-mail: ana@jsmp.tl
Telefone: (+670) 33238883 | 77040735
Website: <https://jsmp.tl>
info@jsmp.tl

Rua Beco Lakateu, Aldeia Manufuik,
Suku Colmera, Administrativu Vera Cruz
Dili Timor Leste
PoBox: 275
Telefone: 3323883 | 77040735

www.jsmp.tl
ana@jsmp.tl

Facebook: www.facebook.com/timorleste.jsmp

Twitter: @JSMPtl